

兩
當
軒
全
集

自敘

景仁四歲而孤鮮伯仲家壁立太夫人督之讀稍長從塾師授制藝心塊然不知其可好先是應試無韻語老生宿儒鮮談及五字學者舊藏一二古今詩集束置高閣塵寸許積竊取繙視不甚解偶以爲可解則栩栩自得曰可好者在是矣閒一爲之人且笑姍且以其好作幽苦語益唾棄之而好益甚也歲丙戌常熟邵先生齊燾主講龍城書院矜其苦吟無師且未學循循誘之景仁亦感所知遇遂守弗去三年公卒益無有知之者乃爲浪遊由武林而四明觀海溯錢塘登黃山復經豫章汎湘水登衡岳觀日出浮洞庭由大江以歸是遊凡三年積詩若干首中漸於嘉

興鄭先生虎文定興王先生太岳之敎家益貧出爲負米
遊客太平知府沈旣堂先生業富時大興朱先生筠督學
安慶招入幕從遊三年盡觀江上諸山水得詩若干首體
羸疲役年甫二十七耳氣喘喘然有若不能舉其軀者自
念鄉所遊處舉凡可喜可愕之境悉於是乎寄恐貧病漂
泊脫有遺失因檢所積十存其二三聊命故人編次之夫
幼之所作稍長輒悔後之視今何獨不然輒爲數語以自
策勵且述辛苦時乾隆乙未季春月之十一日

至家郎園先生搜羅兩書軒集刻本甚備以同治活字本為鎮
庫清志述所編之本當時未及刊以同治癸酉集珍齋以活字印
行後來坊間一再翻雕皆據同治本蓋未見此咸豐八年原
刻本也此本前有是年家塾校梓牌子太倉李錫嘯莊松
列名於校刊姓氏內附錄五後季莊松跋歷述道光丁未歲
乙毛君耕美編纂年譜刻於而友齋當時未得先生原稿
不意缺畧謬舛今歲戊午仲孫志遠字得先生子定葉編纂
付梓序以瞻然再重加刪訂刪雕等語是郎園所謂當時
未及刊者誤也此本實為兩書軒全集是奉之第一刻矣

己巳殘冬崇葵識

仲則先生小象

戊午夏日吳雋摹
于都門廬齋



予幼讀先生之詩疑其人要眇灼灼羸如夷如乃若馳思忽襟
游目悵悵宜顛賴枯槁如三閭之被放而何意權奇倜儻豐順
廣顛虱奕而多姿又何以顛與命違握瑜懷芝慙憐營伊葛纒
逾壯超氛絕缺遷登霞而上馳天蓋嗇其遇以昌其詩歿七十
五年於茲矣荒裔窮壤莫不望風懷想今且恢紘顛網補罅拾
遺人咸幸王公之有孫而吾獨追維躋曩旅殯逮其孰則抱其
殘編斷簡間闕缺掌偕骸骨而同歸噫先生歿於蒲州賴洪更
弇州中丞此集
之存太史力也

鄉後學徐廷華敬題瞿樹蔭謹書

兩當軒集校刊姓氏

宛平趙振祚伯厚

新城楊炳子萱

太倉季錫疇菰耘

常熟邵淵耀環林

楊汝孫書城

昭文瞿秉清心涵

錢福棠仲謙

趙宗建次侯

顧崇福小嵐

儀徵汪彥樹夢梧

興化顧駱耳山

無錫秦細業澹如

金匱薛熊光渭占

錢維樾蔭湘

施建烈叔愚

江陰夏煒如永曦

曹宗瑋蔗畦

六嚴德只

徐思錯康甫

謝申良直卿

靖江熊爾穀宜齋

武進趙 起于岡

屠潤芝毓町

吳誦縉芷蓮

馮景琦性甫

吳瑞麟樸卿

周贊襄淳之

陽湖李述來紹仔

莊續澍玉鯨

左 昂巢生

高承鈺式之

陸黻恩紫峯

洪惠方子齡

姜國楨以貞

周騰虎弢甫

姚士清竹山

湯世銓彥聲

莊鳳威巢阿

史致準伯平

趙曾向朗甫

吳 儆旃

族弟

金會仲愚
怡會季治

族子

開伯初
曾慰素安

兩當軒集目錄

卷一

古近體詩八十三首

癸未至己丑

卷二

古近體詩九十九首

己丑庚寅

卷三

古近體詩八十一首

庚寅辛卯

卷四

古近體詩七十九首

辛卯壬辰

卷五

古近體詩五十六首

壬辰

卷六

古近體詩六十一首 壬辰

卷七

古近體詩五十八首 壬辰

卷八

古近體詩四十六首 癸巳

卷九

古近體詩七十二首 癸巳甲午

卷十

古近體詩六十五首 甲午乙未

卷十一

古近體詩八十一首 乙未丙申

卷十二

古近體詩四十六首 丙申

卷十三

古近體詩六十九首 丁酉戊戌

卷十四

古近體詩七十三首 戊戌至庚子

卷十五

古近體詩五十一首 庚子辛丑

卷十六

古近體詩五十二首 辛丑壬寅
補遺附

卷十七

詩餘七十四首 戊子至庚寅

卷十八

詩餘六十六首 庚寅至壬辰

卷十九

詩餘七十六首 壬辰至辛丑
補遺附

卷二十

遺文

兩當軒集卷第一

武進黃景仁著

古近體詩八十三首

初春

癸未年起

未覺氈爐煖旋懷柑酒新
池臺平入夜原野渺含春
物外欣然意風前現在身
中宵感幽夢冰雪尙嶙峋

舟中詠懷

旦發極清曠夕眺俄幽互
沙迷歸浣蹤葉積返樵徑
白水寒較明昏霧薄將凝
動搖虛舟賞超越滄洲興
同調聞巖岑秦越罕投贈
長歌闕以再傾耳誰與應
殊悲生事薄聊覺野情勝
中宵風鶴聲淒蕭彌孤聽

清明步城東有懷邵二仲遊

水明樓下漲紋平柳外遙山抹黛輕二月江南好風景故人此日共清明征鴻歸盡書難寄燕子來時雨易成尋遍艤舟亭畔路送君行處草初生

題馬氏齋頭秋鷹圖

秋高江館寒生稜眼芒忽觸瑤光星空塵動壁風旋榻颯爽下擊要離精金眸竄注緊腦側下若萬騎相摩聲凝神看定知是畫是誰掃筆如霜硯虛光四來指毛髮殺氣迅走兼英靈懸此可以了魑魅詎有鳥雀來空庭昔年作健臂而走一揮飛破長天青仰天大笑纓索絕韞褱斗大盤高城沙黃日白杳不見圍場散盡毛血腥今見此畫如見

生頭角怪爾逾崢嶸得霜則奮飽則颺呼鷄作弟鷓爲兄
知君氣類極神俊嗟彼雉兔何聊生急將此圖卷高閣眼
前萬物心和平

別意

別無相贈言沈吟背燈立半晌不擡頭羅衣淚沾溼

秋夜酌閨二舟中

移船向君飲款語盡斜暉風細不妨燭寒輕漸逼幃琵琶
商女怨砧杵達人衣起視秋江上蘆花有鴈飛

少年行

男兒作健向沙場自愛登臺不望鄉太白高高天尺五寶
刀明月共輝光

秋夜曲

蟋蟀啼階葉飄井秋月還來照人影
錦衾羅帷愁夜長翠帶痕斷雙鴛鴦
幽蘭裊露露珠白零落花香葬花骨
秋深夜冷誰相憐知君此時眠未眠

靈壁磬石歌

青神赤堊輸球琳泗濱作貢傳至今
古樂雖亡古質在歷久剝削沈坑深
產饒欲盡不盡氣得徑尺價昂兼金
當年帝命后夔夏聖作聖奏聖所歆
於風斯乾樂斯振知民立辨宣鬱沈
後人好尙乃大異用作拱玩搜巖岑
金鐘玉琯失依附洞房曲几添清陰
峯巒洞穴卒嗟見鏤刻微渺窮芒鉞
螭盤蛇臥文型別方壇華蓋開張森
澄心堂硯秘制

出宣和天翰尤淋淋丈人忽作束腰具坐以神物供荒淫
文人癖嗜更多有寶貴奚啻同天琛齋空松雪圖史散庵
廢海岳莓苔侵昔賢手澤半零落望誰更辨泠泠音一拳
把玩不忍釋悄思登岱臨風吟國工國器交有待完璧且
作無絃琴後人得此重愛惜中有入海千秋心

雜詠

東方月出皎照見傾城姿君寵正專房不信能棄夷梁塵
飛更寂瑤枝冷欲披一朝繁華露化爲千淚絲終知恩決
絕未免心然疑詰旦理清鏡方知玉貌移天長滄海闊何
以度蕭時

小鳥有比翼雙飛愁天寒朝衙樽桑枝暮巢琪樹端勞生

豈不惜幸有相與歡長天渺征路中道逢哀鸞關山引孤
鵝毛羽自摧殘文采亦已高誰與相盤桓陽岡有梧實努
力加朝餐

生年三五時瑤華比光彩萬事匪所憂此景若常在既見
故者非旋見新者改未覺少壯過祇增前日悔所悔行樂
遲精役形乃殆不知何事勞但若有所待賤軀一何眇前
後各千載

層雲結廣廈海鷲東南飛年年巢君屋主人心不疑穿樹
樹枝密入花花影稀卽此全盛日願能常見之胡爲闕時
歲忽忽恩變移舊巢旣已毀梁在無畱泥豈不懷新居但
感舊所知徘徊日云暮燕燕空爾爲

朝行燕市中夕宿夷門道酒徒旣寂寥信陵亦荒草壯士
重一言千金失其寶萬里擁頭顱朝在暮不保當其悲來
時天地亦爲老感此抱區區雙鬢如蓬葆睠言懷古人憂
心怒如擣

子雲耽清淨家貧常晏如奇字世不識不知讀何書苦爲
元秘言惜此名山軀後塵誰能步尙哉珍令譽

皎皎明月光延緣上空林幽堂悄然白彷彿來素心素心
日以隔蕭景日以逼薄幃生虛寒夢醒如在側攬衣起徬
徨橫涕下霑席寸心常不移可以照顏色

駸駸感驟驥惻惻聆悲泉寂寂登高樓幽幽發素絃風川
滯吳越塵陸界幽燕遠目易晡夔懷人信流連白雲詎能

盡坐此素景遷緘情竟何待朗吟歸來篇

方壺隔滄澥縹緲鬱靈異至者烏可知望者空以涕欲度
旣無梁安能坐憔悴一水具溟渤一石具嵩岱化理本不
殊舉目皆有會莫恤鄒生譚馳精九州外

行行向京雒冠蓋織古今疲極或慨息偶云慕泉林長揖
挽之去至竟非其心朝來出門望車跡恐不深驚流少潛
魚疾颿無安禽亮矣子陵釣愍哉嵇生琴

浮海去南越望古建德國渺懷結衣冠愴慮動顏色誰知
此中人出入惟作息淵明有心人歸擬避秦客千載桃花
源想像遺民宅自崖詎能從問津信何益無懷與葛天吾
將其晨夕

中庭有勁草烈烈凌寒霜及至衆芳發努力媚春陽奇質
無可見一心與物忘嗟彼礲礲者先時自摧傷

修修孤生木叢叢蔽荆棘何意來良工空山遂物色彫鉏
成方圓顧盼與修飾芬芳襲衣綦塵垢幸拂拭在物匪可
耽幸伴君子側宛轉望君知莫忘本性直遺簪與敝帷千
載欽亮德

胡粵異哀樂春鳥亦殊音曉牖展晴蔭飛鳴遞簷陰聞見
異鄉土其此當春心萬物欣有託吾嗟竟安任

蛾眉朝見寵夕嫺來羣陰譖醜伏禍淺譽美藏機深療妒
世無藥那可知其心周旋影自失恟怳魂相尋溪頭浣紗
女日暮愁淫淫彼此更相羨泣下俱沾襟

古交戒情盡今交患情離苦自畱其餘不知將贈誰寶劒
旣心許慨然脫相遺安用掛樹日悲此宿草爲

貧女中夜織扃戶絕四鄰熒熒一燈影自落空草根伊軋
而虛壁中織時悲辛顏色不自達誰知此女貧貴賤異繒
錦各出桑蠶身同生而異造賦命安可論惟當自努力弗
使機生塵

九鐘鳴豐山青女肅宵駕萬植浮餘榮陰陰斂逾下惡木
旣失蔭崇蘭亦頽化感此離居憂舉帷達遙夜所歡入我
夢告我容華謝霍習不可追寒光滿虛榭

人生處天地纖塵棲弱草風至草動搖微軀不自保萬物
謀所寄時至安能巧大壑藏舟移過眼疾於鳥何用心入

事兀兀抱枯槁

中夜理瑤瑟未理百憂結欲彈舊時聲中曲變嗚咽手爪
非不同芳華有時竭絲桐爾何知應我心中節揮謝不復
調徒使肝腸絕

擬飲馬長城窟

秦城蒼蒼漢月白秋風飲馬城邊窟
髑髏出土繡碧花猶道秦時築城卒
秦皇築城非不仁漢武開邊亦可人
遮斷玉關朝遣戍長驅青海夜生塵
祈連封後焉支失絕漠愁胡眼流血
殘星點點散牛羊霜天蕭蕭動鬢策
聞道官家重首功輕車仍拜未央宮
從此北庭常保塞幾曾南向敢關弓
射生舊日雲中守列帳傳呼賜牛酒
三時禾黍種連

雲四月桃花開馬首城郭安西淨掃除蒲桃天馬貢長途
太平不用封侯相衛霍於今只讀書

題畫

淙淙獨鳴澗矯矯孤生松半夜未歸鶴一聲何寺鐘此時
彈綠綺明月正中峯髣髴逢僧處春山第幾重

遇王大邦譽

不是逢搖落誰知宋玉愁及關方浩歎出峽又扁舟驛路
成傾蓋霜天各敝裘蕭蕭詞客鬢幾度異鄉秋

十三夜

初更疾風雨孤館生薄寒夢醒忽見月仍在疏櫺閒推窗
面軒豁巡簷步蹢躅林色黯逾潔驚鳥棲未安晴雨忽異

境頓作新霽看始知造物幻倏霍無其端清光滯同色中
夜發長歎

秋夕

桂堂寂寂漏聲遲一種秋懷兩地知羨爾女牛逢隔歲爲
誰風露立多時心如蓮子常含苦愁似春蠶未斷絲判逐
幽蘭共頽化此生無分了相思

登千佛巖遇雨

木落千山秋天空一江碧賈勇登巉巖決背瞰危壁獵獵
虎嘯林陰陰龍起澤膚寸足下雲倏已際天白急雨翻盆
來疾雷起肘腋同游三兩人相望失咫尺飄然冷風過烟
霾漸消迹雨腳移而東長虹逗林隙山翠溼淋漓苔空見

白石快哉今日觀橫寫百憂積山川美登眺嗟余在行役
陟高峻親廬犯險乖子職歸當置濁醪孤酌奠驚魄

游白沙庵僧舍

偶展登臨興攀蘿到上方江流送今古僧話雜興亡漱罷
水泉冷聽沈山磬涼歸來林塢夕高處尙斜陽

感舊

大道青樓望不遮年時繫馬醉流霞風前帶是同心結杯
底人如解語花下杜城邊南北路上關門外去來車匆匆
覺得揚州夢檢點閒愁在鬢華

喚起窗前尙宿醒啼鵲催去又聲聲丹青舊誓相如札禪
榻經時杜牧情別後相思空一水重來回首已三生雲階

月地依然在細逐空香百遍行

遮莫臨行念我頻竹枝畱浣淚痕新多緣刺史無堅約豈
視蕭郎作路人望裏彩雲疑冉冉愁邊春水故粼粼珊瑚
百尺珠千斛難換羅敷未嫁身

從此音塵各悄然春山如黛草如烟淚添吳苑三更雨恨
惹郵亭一夜眠詎有青鳥緘別句聊將錦瑟記流年他時
脫便微之過百轉千回祇自憐

吳山寫望

雲蒸海氣欲浮城雨過江天曠望清踏浪人歸歌緩緩回
帆風定鼓聲聲潮頭前後英靈在浙水東西王氣平回首
西湖真一掬幾番花月送人行

觀潮行

客有不樂游廣陵臥看八月秋濤興偉哉造物此巨觀海
水直挾心飛騰溟溟萬萬夙未屆對此茫茫八埏隘才見
銀山動地來已將赤岸浮天外砰巖礧岳萬穴號雌雄
吟六節搖豈其乾坤果呼吸乃與晦朔爲盈消殷天怒爲
排山入轉眼西追日輪及一信將無渤澥空再來或恐鴻
濛溟唱歌踏浪輪吳儂曾齋何物邀海童答言三千水犀
弩至今猶敢擐其鋒我思此語等兒戲員也英靈實南遊
只合回頭撼越山那因抉目仇吳地吳顛越蹶會幾時前
胥後種誰見知潮生潮落自終古我欲停杯一問之

後觀潮行

海風捲盡江頭葉沙岸千人萬人立怪底山川忽變容又
報天邊海潮入鷗飛艇亂行雲停江亦作勢如相迎鷺毛
一白尙天際傾耳已是風霆聲江流不合幾回折欲折瀟
頭如折鐵一折不添百丈飛浩浩長空舞晴雪星馳電激
望已遙江塘十里隨低高此時萬戶同屏息想見窗櫺齊
動搖潮頭障天天亦暮蒼茫卻望潮來處前陣纔平羅刹
磯後來又沒西興樹獨客弔影行自愁大地與身同一浮
乘槎未許到星關採藥何年傍祖洲賦罷觀潮長太息我
尙輸潮歸卽得回首重城鼓角哀半空純作魚龍色

秋風怨

枯草搖天黃白楊醉霜紫驄馬嘶不歸秋風葬羅綺

湖上和酬仇麗亭

袖裏琅玕一笑投，憑欄朗誦破枯喉。湖山本是君家物，風

月翻添客裏愁。

贈詩有錦囊收却西湖去之句

夾岸晚荷香墮水，一堤烟

柳澹思秋采。菱聲散橫塘暮，多病詞人莫倚樓。

雨後湖泛

風起水參差，舟輕去轉遲。一湖新雨後，萬樹欲烟時。有客倚蘭楫，何人唱竹枝。蓮娃歸去盡，極浦剩相思。

過釣臺

上者爲青雲，下者爲朽壤。立足一不堅，千古徒悵悵。先生際中興，空山寄偃仰。乾坤自清寧，道不與消長。釣臺高幾幾，江水平如掌。其下多估帆，驚利日來往。未知此中人，見

亦作何想而我適過之輕風吹五兩彌望烟雲深高吟眾
山響

雜感

仙佛茫茫兩未成祇知獨夜不平鳴風蓬飄盡悲歌氣泥
絮沾來薄倖名十有九人堪白眼百無一用是書生莫因
詩卷愁成識春鳥秋蟲自作聲

或戒以吟苦非
福謝之而已

寒夜曲

客苦吟雲陰陰客吟苦天亦雨雨淅淅風淅淅孤燈縈曳
刮作絲欲滅不滅飢飈疑風大起雨忽止凍鼓無聲破柝
死深巷小兒呱呱啼牀頭阿母知未知

曉雪

先生屋小如宛邱歲晏苦聽風聲愁一宵風息得安寐同
雲已閣低簷頭曉來重衾足不熱卻怪紙窗明太澈小童
狂喜排闥來報道空庭已堆雪撒鹽飛絮猶紛紛隔卻一
紙無聲聞反披羊裘洞扉立心目照曜寒無垠此時興發
睡魔去今年見雪此初度傾囊只合市村醪炙硯還應遣
長句微哦忽忽思前遊丙戌歲暮吳陵舟歷篷大雪苦無
飲至今典卻相如裴回頭此景如電掣其閒聚散復一瞥
范陽公子詩中豪謂閑季心白戰何曾持寸鐵此雪應讓燕山
多擊筑故人悲且歌寒夜誰來剡溪訪乘興欲往將如何
將如何雪不止隨風飄揚低復起散入千村萬村裏山僧
執帚仰看天昨夜廚空已無米

莫打鴨

莫打鴨打起鴛鴦睡鴛鴦飛去尙成雙落得芙蓉妾心碎

春夜聞鐘

近郭無僧寺鐘聲何處風短長鄉夢外斷續雨絲中芳草
遠逾遠小樓空更空不堪沈聽寂天半又歸鴻

客中清明

新火依微出遠村天涯時節獨開樽故鄉陌上多車馬是
處墳頭有子孫柳帶緘來沾別淚石泉夢後愴吟魂此間
我亦思家苦遠郭青山似白門

三月一日道中偶成

馬上年華似擲梭雨顛風駛奈愁何三分花事二分去九

十春光六十過幾陣簫聲山店遠一鞭柳色酒旗多壓鞍
詩思何能遣半爲懷人感逝波

春雨望新安江

入春三月雨不止意欲漲滿新安江杏花溪間流更急四
山靜聽聲淙淙盤沙硯石不相讓苦與洪湍交春縱我來
客冬山水涸扁舟萬力勞扶扛十篙上瀨復九退船背沙
石磨瑣琤苦緣上流勢猛惡乾冬尙且艱行艤況今千山
萬山雨并作一道奔驚瀧舟人同此筋力耳胡能與此相
衝撞朝來客從武林至時陳薰圃至下流見拍潮頭降若從此
時放舟去兩日已下錢塘椿我思武林好風景江山撥秀
來軒窗經春山筍節擡脰出水河魚腹膨肛酒船銜尾六

橋外酒徒四集人語哢胡我鬱鬱久居此低頭顧影隻不
雙多時塵汙積芒屨獨夜鼠踏翻銀釭坐愁行歎困羈旅
飲不成戶歌無腔依人偃蹇竟何濟此不逕去將毋蠢明
當放溜趁新漲臥聽船鼓催逢逢

檢邵叔山先生遺札

死別生離各泣然吞聲惻惻已經年帆開南浦春剛去舟

到西冷月正圓

二語昔年別先生之武林詩
未成而發後得書示和章

當日祖筵如

夢裏卽今展翰又天邊傷心一樹梅花發更有誰移植墓

田

庭梅一株先生嘗勸其下曰吾老
去移此植墓田足矣竟成語識

春晝曲

楊花飛游絲颺兩地相逢不相讓畢竟楊花性更柔因風

復上楊枝上游絲一縷當空垂欲落不落花裊裊須臾駐
向花陰去有意尋之不知處楊花飄蕩絲纏綿游子心傷
望遠天寄語高樓休極目鳥啼花落自年年

花前曲

巡簷花滿地倚檻香畱枝看花易腸斷攀樹最相思
水流旣入海月缺能重圓花落樹猶在花前人可憐

焦節婦行

雄雞齊喚霜滿天看郎刀裹肩上肩里行促發似豺虎語
聲未畢行塵前熒熒爲君守鄉里妾身雖生不如死牀頭
有兒呱呱聲此時欲死還宜生翠鈿羅襦一時卸轉託鄰
翁向街賣郎行慎勿憂家中妾身可碎妾不嫁生當努力

青海頭死當瞑目黃泉下等閒一度十九秋兒成學買事
遠遊妾存已似枝上露郎在亦白天邊頭五更城頭吹曉
簾黑雲如輪月如漆熒熒一點青釭寒蟋蟀在戶鬼在室
忽然四面來血腥舉頭瞥見神魂驚一人手提髑髏立遍
體血汙難分明汝近前來妾不懼果是郎歸定何據一風
暗來飄血衣去日曾穿此衣去郎歸妾已知但怪來何遲
牀頭一燈滅梁上長繩垂昔聞瀚海風沙一萬里郎兮幾
時飛度此妾死尙欲隨郎行看郎白骨沙場裏

道旁廢園

何人行樂處零落見陂池草竟長於我花還開向誰盛時
來已晚過客見同悲問訊樵蘇者模糊半不知

遇伍三

君問十年事淒然欲斷魂一無如我意儘可對君言別屢
足猶在鞭多舌幸存相期著書好歸去掩蓬門

山寺

晚林藏古剎地僻到人稀遙望隔松塢逕來敲竹扉笑迎
僧有相驚竄鼠多機塔爾忘言說鐘聲滿翠微

訪曹以南五明寺

一路是修竹到門惟鳥聲幽人正眠覺稚子解將迎香縷
斷還續道書縱復橫昨宵雷雨急可有毒龍驚

遇故人

終日相對或兀兀別去乃積千萬言誰知此地復攜手仍

無一語如從前世人但解別離苦今日相逢淚如雨風塵
滿面霜滿頭教人那得有一語

僧舍夜月

寂寂諸天夜氣中闍黎粥後飯堂空低頭雲影時爭月入
耳松濤獨受風遠跡已堪鄰虎豹定心可許問魚龍一龕
彌勒遙相對歲久琉璃焰不紅

醉醒

夢裏微聞薜蔔香覺時一枕綠雲涼夜來忘却掩扉臥落
月二峯陰上牀

石鰲塢洞天福地遺址

地爲張三
丰仙處

鳥道一綫懸崖開攀蘿盡處登丹臺仙人蟬蛻去已久遺

像剝落蒙塵埃石牀丹竈雨氣溼一池黝碧巖之隈青林
鬼語晝啾唧空廊虎跡宵旋回傳聞昔年盛金碧朝鐘暮
鼓聲喧厖爐烟不與雲斷續殷腳欲破山崔嵬數十年來
變蕭索山人指點餘莓苔羽衣散盡香火絕時有丐者僵
苔堦我思化人本無著偶然此地遺其骸愚夫奇貨據靈
躡興廢乃到空山來愀然日暮不能立松風萬壑鳴吾哀

客中間雁

山明落日水明沙寂寞秋城感物華獨上高樓慘無語忽
聞孤雁竟思家和霜欲起千村杵帶月如聽絕漠笳我亦
稻粱愁歲暮年年星鬢爲伊加

初春

不分春風解勸餐只將幽恨上眉端將歸燕子休垂幕漸
老梅花莫倚闌最怕難醒惟獨醉生憎易中是輕寒新傳
多少紅箋字半爲昏盹未忍看

醉歌行別伍三

星熒熒月皦皦漏聲將殘客行少有客倉皇竄荒草十年
仗劒都亭行鼓刀賤者知姓名仰天酒盡各萬里驀地相
逢服華紫悲來歔吁浮雲四徂揮手且去各爲長圖浮雲
何蕭蕭川陸何悠悠白楊著霜古隴頭磬磬飛雁悲其儔
嗚呼昨日不知今日雨居者不識行者苦天寒日暮君莫
畱他日相逢與君語

衡山高和趙味辛送余之湖南卽以畱別

衡山高湘水深我爲此別難爲心君知我行不得意爲我
翻作衡山吟衡山吟聲漸苦悽斷湘絃冷湘浦女蘿山鬼
風蕭蕭七澤欲凍黿鼉嗥下見蒼梧萬里之大野上有祝
融礙日之高標魚龍廣樂不復作雁飛欲墮哀磬磬漁父
拏舟入烟水屈原行吟意未已千古騷人且如此我輩升
沈偶然耳衡山之吟吟且停此曲悽絕難爲聽我亦不弔
湘夫人我亦不悲楚靈均只將此曲操入水雲去自寫牢
落招羈魂前途但恨少君其誰與醉倒金庭春春來沅芷
倘堪折手把一枝歸贈君

月下雜感

明月幾時有人閒何事無傾城顧形影壯士撫頭顱方寸

誰堪比深宵我共孤感君行樂處分照及蓬廬
聞道姮娥嫁于今是結璘河山收地魄宮闕爛天銀前度
曾愁我今宵更照人高寒吾不畏去路恐難真

江行避潮戲成

回沙剛得一舟停轉眼潮來天地腥一樣蘆中作窮士卻
教人避子胥靈

甬江舟中看山甚佳

甬江江頭發清曉四顧無如我舟早紅樹千行雁一聲兩
岸秋山入綿渺看山鎮日開孤篷轉帆面面隨樵風帆歛
風急作鴟叫頃刻已過山千重一峯對面一峯隔每見一
峯浮一白酒酣倒喝行雲來似有山靈謝顏色明朝還到

海東頭青天一髮見琉球此時回憶看山處又似蹄涔薛
擢遊

和仇麗亭

八月從新安歸經武林與麗亭匆匆話別十月復從山陰來麗亭出仲秋見贈

詩五章次韻答之

前年爲訪天都去今歲因探禹穴來來往江潭各如夢逢
君仍在越王臺

鴻爪遊蹤首重回經年襍穢逐塵埃青山笑客不歸去爲

報飢寒驅又來

典衣曾共湖干宿次第看花不憶家幾度哦君好詩句先

生意獨在梅花

與君同向梅花宿亂山堆裏夢梅花君前後贈句也

多君憐我坐詩窮襤被蕭條囊橐空手指孤雲向君說卷

舒久已任秋風

惜別匆匆悔見遲楚雲千里是相思遙知此去湘潭柳一

夕清霜似鬢絲

時將楚遊

登鎮海城樓觀海

地不足東南厥池曰朝夕浮天忽如夢絡域斯其脉歸塘
無盡藏委輸孰爲役渺茫撫遺經鴻濛期夙昔一越而三
千奢願何時釋五更登茲樓儼爾墮心魄冶夷疑蜃遊騰
軒怖鰲擲星星獻殷霞照面不成赤霞奔如有聲日起已
千尺濛濛溼未收照見島烟白髣髴樽桑華閃盪碧津碧
天開東皇家帝與九老宅且可神與遊詎能目爲逆青岱
隱北指甌越昧南適嗟茲剡鄞聞生民夙多厄妖寇時紛

乘島夷每充斥去滅濤千尋來便風一席海隄復時潰當
衝盡枯骼我來幸清晏所見餘悲喈休養氣漸蘇承平歲
逾百避風無爰居澄瀾有水伯破車歸波臣響杼坐泉客
蓬萊隱可望祖洲了如積萬頃明鹽田三時貢蕃舶隨珠
出沈淵顛貝來重譯所苦雀躍遊欲往體無翮誰滲媧皇
灰助填精衛石盡化桑田平無使溲溟隔餐得楓香歸顏
光駐駒隙

明州客夜懷味辛稚存卻寄

別來甫及旬離思已如積海角多飄風入夜更凜冽魚龍
一以嘯濤聲震空壁凍鼓慘欲沈寒檠短將沒何來萬感
交擾此寸腸裂念我同袍人按鋏起歎息悲歡共情懷來

往溯晨夕各抱百年憂念我更惻惻苦語猶在耳形影儻
以隔豈曰輕遠遊欲已不可得

兩當軒集卷第一

兩當軒集卷第二

武進黃景仁著

古近體詩九十九首

春日樓望

一碧招魂水漲津
遠山濃抹霧如塵
忽風忽雨春愁客
乍煖乍寒天
病人芳草遠黏孤騎沒
綠楊低罩幾家貧
天涯飛絮歸何處
不到登樓也愴神

錢塘舟次

羅刹磯頭落照陰
鐵幢浦口夕波沈
卸帆只憶吳淞岸
擁楫驚聞越客吟
風雪衣單知歲晚
江湖酒病與年深
浮雲欲別休回首
千里蒼梧是去心

時將
楚遊

夜泊聞雁

獨夜沙頭泊，依人雁幾行。
怱怱玉關至，隨我度衡陽。
汝到衡陽落，關山我更長。
悽然對江水，霜月不勝涼。

舟發西安至東巖夜泊

清晨發西安，四野動雞鳴。
人烟起橘柚，村落隱相向。
川景明朝暉，宿霧自消蕩。
萬壑霜風乾，清江寂無漲。
一一過巉巖，入江更多狀。
出沒窮雕瓠，盤回互倔強。
舟行苦相持，帆勢忽阻喪。
所喜泉石清，終日娛騁望。
短晷歟西馳，蒼巖更孤傍。
隱隱遠峰出，稍稍明月上。
遙指常山程，終宵一惆悵。

曉發

荒雞鳴四野，遊子已晨興。
殘雪消不盡，曉風寒更增。
連岡

盤疊疊細路出層層多恐吟軀重疲驢瘦不勝

途中遭病頗劇愴然作詩

搖曳身隨百丈牽短檠孤照病無眠去家已過三千里墮
地今將二十年事有難言天似海魂應盡化月如烟調糜
量水人誰在況值傾囊無一錢

今日方知慈母憂天涯涕淚自交流忽然破涕還成笑豈
有生才似此休悟到往來惟一氣不妨胡越與同舟撫膺
何事堪長歎曾否名山十載遊

病愈作歌

淦江一夜大風雪病熱忽減身知寒曉聞飯香腹殷吼生
氣自怪來無端同舟估客喜相賀長年柁工心始寬我曾

大小數十病雖脫鬼手生則殘有如老將身經百餘戰遍
體刻畫皆瘡癥重經戰處始長歎孤軍弱壘心茫然我思
冥中亦豈厭狂客幾度得遣吟魂還或者天意忌作達坎
壖使識爲人難否則山靈水怪夜深哭畏我幽僻工彫剜
明知無益聚爲祟汝曹再至真無顏我歌至此啞然笑呼
藤疆立行蹢躅推篷急欲看日影風前獨倚愁孤孱嗚呼
病而得愈且休歎但恨失卻半月船頭山

秀江夜泊

夜氣一何悄扁舟繫古杉潭空孤月印峯黑一燈嵌薄霧
侵殘蠟清霜戀故衫徘徊難久立懼有老蛟饞

湘江夜泊

三十六灣水行人喚奈何楚天和夢遠湘月照愁多霜意
侵芳若風聲到女蘿烟中有漁父隱隱扣舷歌

屈賈祠

雀窺虛幙草盈墀日暮誰來弔古祠楚國椒蘭猶自化漢
庭絳灌更何知千秋放逐同時命一樣牢愁有盛衰天遣
蠻荒發文藻人間何處不相思

過馬氏宮址

此地當年歌舞盈沈沈別殿宴三更一時粉黛齊回首東
野新填樂府成

俄令野屋化千門匠手居然帝業尊開遍天桃又穠李東
風忙煞會春園

纔從宮樹聽啼烏旋見荒臺叫鷓鴣不用官家親飲馬一鞭已塞洞庭湖

長驅紅粉出荆關舊日承恩數阿蠻老大飄零人不識月明低唱望家山

野望

由來卑溼地悵望一淒迷遠服通三郡蠻烟接五溪思親無雁過爲客又鶯啼貧病孤舟好天南息鼓聲

題橘洲僧樓

褰裳涉芳洲澤國草萋碧湘柳搖青春湘花照顏色淼淼烟波獨倚樓楚天望斷木蘭舟此閒自古多離別日暮江空我欲愁

僧舍上元

獨夜僧樓強自憑，傳柑時節近寒凝。
怕聽歌板聽禪板，厭看春燈看佛燈。
好景笑人常寂寂，春愁泥我漸騰騰。
今年準擬捐花事，坐斷蕭齋一榻繩。

難忘曲

芙蓉作陣落江水，斑竹淚枯愁帝子。
魂兮飛來立江皋，江烟凝白下復高。
魚腹已穿顏色好，衣冠死灰人未老。
酌君酒兮當相思，人間難忘惟別離。

感舊雜詩

風亭月榭記綢繆，夢裏聽歌醉裏愁。
牽袂幾曾終絮語，掩關從此入離憂。
明燈錦幄珊珊骨，細馬春山剪剪眸。
最憶

瀕行尙回首此心如水平東流

而今潘鬢漸成絲記否羊車並載時挾彈何心驚其命撫
柯底苦破交枝如馨風柳傷思曼別樣烟花惱牧之莫把
鴟弦彈昔昔經秋憔悴爲相思

柘舞平康舊擅名獨將青眼到書生輕移錦被添晨臥細
酌金卮遣旅情此日雙魚寄公子當時一曲怨東平越王
祠外花初放更其何人緩緩行

非關惜別爲憐才幾度紅箋手自裁湖海有心隨穎士風
情近日逼方回多時掩幔畱香住依舊窺人有燕來自古
同心終不解羅浮塚樹至今哀

寄麗亭

書疏經年閤鄉關共遠天遙知一橋下時泊五湖船

君門前橋

名一橋余之武林每艤舟焉 武湘草已堪折塞鴻何處邊飄零吾分定愁

煞路三千

君問長沙地荒涼爾未經迎神猶故曲賦鵬尙空庭魑魅
天南產文章地下靈憂生兼弔古那不鬚星星

每放登高慟浮雲爲慘悽湖吞全楚盡天壓百蠻低才命
古難一行藏我欲迷懷人原有淚況聽暮猿啼

耒陽杜子美墓

得飽死何憾孤墳尙水濱埋才當亂世併力作詩人遺骨
風塵外空江杜若春由來騷怨地只合伴靈均

洞庭行贈別王大歸包山

太湖亦名洞庭而太湖之包山暨洞庭之君山

皆有洞
庭之名

洞庭一瀉八百里浮雲貼天天浸水君山一點礙眼青卻
似今日酒酣別君之塊壘問君來何爲欲浮湘沅窺九疑
問君去何以爲怯蛟龍畏山鬼送君洞庭水言歸洞庭山
洞庭之山具區裏入九雲夢吞其閒山名水名一而已吳
楚閒關幾千里誰知地道巴陵中金庭玉柱遙相通吾儕
俗骨不能到但看長風巨浪心忡忡楚人肯道七澤小吳
儂但誇具區好橙黃橘綠鱸膾鮮我怪君行猶未早與君
同時客殊方看君獨歸心自傷蠻烟瘴雨土卑溼畱我寄
命於茲鄉但得相逢似人喜此日天涯可知矣安能鬱鬱
久居此明日扁舟亦東耳前途待我烟波中急棹來追子

皮子

把酒

把酒意如何深宵幽感多春心憐逕草生意撫庭柯名豈
身能待愁將歲共過由來著書願禁得幾蹉跎

哭叔山先生兼懷仲游

我生受恩處虞山首屈指我愧視猶父視我實猶子寧幃
識諸郎入坐皆蘭茝君也交更深經年其膏晷北海時一
樽環顧公心喜跌宕饒天情琢磨究名理與世殊酸鹹於
物少臧否自謂春風中偕坐從此始

無何狂飈吹萬變在轉盼絳帳儵已虛人琴忽長判君復
輕裝來束書別同伴幽堂落月中一見淚如霰豈意吾兩

人如此作聚散短衣復出門氣結肝腸斷

君旣歸虞山吾行詣新安便道一握手相對同撫棺楓林
一萬樹血淚爲之殷浮雲一千里飛去何時還苦語未及
盡別曲歌將殘十步九躑躅回首隔吳關

作客如在家在家反如客所以三年來衣上塵土積昨過
西州門芳草又萋碧驚心匪旦暮觸目少疇昔爲念同袍
人中感更紆塞疾病俱顛連關河況阻隔良讌詎可期庶
幾夢顏色

夜與方仲履飲

細酌向明月含情問柳條春人俱欲去直是可憐宵

春夜雜詠

并序

寓齋幽闌於月爲宜深宵無寐觸緒成詠旣感身
客復傷春暮章句稍積偶自編次之不復點竄聊
破岑寂云爾

開尊綠陰下晚景漸飄忽薄靄收斜暉餘光讓初月望望
碧天遠稍稍愁思發停尊無一言伫看新絃沒

初三夜獨飲

輕陰積孤館枕簟流微涼浮雲靜中過露氣緣宵長捲簾
忽有得草木同一香愛之久延伫餘溼沾衣裳

初四夜微雨尋霽

苦霧翳空碧夜靜慘不收濛濛遠楊合漠漠閒花愁何處

玉簫起離人雙淚流

初五夜霧甚

香艸滿澤國興言泛蘭舟飛花蕩江水日暮游人愁盼遠
漠無寄緘情溯回流殘陽浦雲外半月烟林頭解衣坐當

檻宿鳥方啾啾

初六日遊橘洲歸有月

朝來送遠客春雲爲我陰別時一樽酒餘醉猶惜惜飛雨

過窗樹穆然簾幃深獨立忽成怨相對少素心遙知艤舟

處應在青楓林

初七日送王大蔚如別夜微雨

客居畏清夜無月更孤悄微寒逗疏櫺濃陰起幽篠烟重

野鐘歇窗深夜燈小燈光逐遊魚時時響深沼

初入夜月不堪皎已

而無

月

雲中破秦鏡簫管爲吹開陰陰入我庭濫濫漾我杯一飲

無異照東西分歡哀因憶倚樓者離腸中夜摧

初九夜有月聞鄰院

歌宴

秉燭達夜闌身爲遠行客作書慰故人短紈不盈尺冥心

一沈思丰采殊未隔清光一千里爲我寄長憶夢短關山

長欲往何由得

初十夜作味辛稚存書

背手巡空垣皓魄忽堆素合睫暉餘凝低頭影相步驚禽
時一翻簷花落無數微微辨游絲裊裊入深樹

十一夜

曉起視日景熊昱炎光韜驟欲卸衣絮竊恐無良宵微風
消翕習陰鳥鳴啾嘈驟雨忽如注急霽翻銀濤入夜勢未
息雷殷聲低高塊然擁衾臥切切聞愁交明朝碧湘上應
有流紅飄

十二夜雨

餘溼猶在樹虛寒逼空堂衾薄不成寐攬衣起徬徨同此
春宵中今昔殊炎涼客居旣多感離憂胡可長願借晨風

翼翻然歸故鄉

十三夜雨霽寒甚

對酒此何夕
衮衮集良譙
聽歌無一情
感寓每中歎
幸有湖海英
其此華燭爛
稍覺孤心傾
已見人影亂
賤子本恨人
卽境悲聚散
落月歸幽齋
歡場一思遍

十四夜王廉使招宴

金樞湧靈曜
洗濯自太古
茫茫吐遙天
漸漸映平楚
高樓四顧望
何處非三五
清遊歇西園
離懷極南浦
但覺愁四來
至竟不能語
徘徊達殘更
晨星詎堪數

十五夜樓上對月

池檻入深暝
黯慘流金波
人覺今日病
月是前宵多
哀角隱城堞
愁烏叩庭柯
盈襟汗酒漬
積日逢吟魔
春殘月將缺
如此異鄉何

十六夜

池上獨飲

偶把池邊釣
因看檻外山
孤心遂一往
竟日未知還
含意

待誰解經春此破顏陶然已沈醉夢繞綠蘿間

聞子規

聲聲血淚訴沈冤啼起巴陵暮雨昏只解千山喚行客誰知身是未歸魂

登衡山看日出用韓韻

峩峩衡岳配朱鳥帝與作鎮炎荒中五峯插天祝融最突兀誰與爭其雄吐吞燦爛屏幽魅億千萬紀功無窮絕頂曾聞見海日半嶺已覺來天風千盤及冢夜將半呼吸果與元關通高臺岌嶮礙星斗捫天捏石身登空海水半髮白堪掬明霞幾點碎不融人言此時日將出彷彿水底離珠宮須臾一綫吐復落蒼然萬丈車輪紅九荒八極蕩無

翳照我一寸披丹衷歸瞻神宗仰肅爽僧衣道客行鞠躬
悄然坐對愁四集名山有約誰能同明明神君鑑鄙意此
身不向兒女終他年五岳倘閱遍一息尙在叨神功猿呼
鶴警寺鐘歇俛視下界方瞳矐徑欲身騎二龍去御氣直
到扶桑東

辰陽道中

武溪溪頭桃柳春龍標城畔雨如塵山通黔蜀多逢瘴地
雜蠻獠喜遇人但聽鳥啼能墮淚況看鳶跼更傷神功名
自昔猶如此莫爲漂零怨此身

黔陽

黔陽水冷山刺天千年積瘴生綠烟行人暮入不知出但

聞猩猩子規啼耳邊蠻歌夜深過雲上和我車前鐸鈴響
清時幸少豺虎亂勞生久絕風雲想江山故國是耶非空
擬孤帆他夜歸聞道江鄉春雨後桃花新漲鰕魚肥

江上夜望

推蓬失孤鶴雙槳倚蘭皋雲淨江空處無人月自高

黃陵廟

地老天荒處千秋帝子心人間離最古竹上淚猶深目斷
珠邱杳魂歸澧浦陰至今嗚咽水二十七絃音

遠祀常畱楚焚山斷自秦波濤猶阻客風雨自隨身香草
皆遺蛻湘纍是替人揚靈如可接我亦唱迎神

三江口阻風

槲葉陰中水霧腥。鷓鴣啼處一舟停。無端浪挾巴邱白，不盡天垂梧野青。窗外三江流浩浩，雨餘七澤氣冥冥。風波如此來何事，日暮愁心滿洞庭。

湖上阻風雜詩

蕭蕭落木動微波。自古湘中有怨歌。一十二峯青曲曲，綠雲多處見湘娥。

沄沄水氣變朝昏。日色如灰轉眼沈。時見空中紫烟起，定知何物在湖心。

平湖八月浩無津。明月蘆花思煞人。縱使洞庭齊化酒，只宜秋醉不宜春。

長沙秋色遠蒼茫。今夜扁舟又此鄉。生怪三江合流處，最

禁人望是清湘

楚天歸思暮飛騰破浪乘風病未能若是吳山通地穴何

須辛苦下巴陵

山海經注君山有石穴通吳之包山

岳陽樓用杜韻

獨客盡吳楚浩然登此樓三巴平檻落七澤與身浮寂寞
金庭曲飄飄鄂渚舟登臨幸無事有淚不須流

江口晚步值雨過水發不得舟渡跣行數里歸舟

得詩

平沙荒港步逡巡顚顚靈均澤畔身水國風烟多異候殊
方咫尺得迷津江湖有信如迎客漁父無言似笑人尙憶
千秋杜陵叟猶因地主慰沈淪

黃鶴樓用崔韻

昔讀司勛好題句十年清夢繞茲樓到日仙塵俱寂寂坐
來雲我共悠悠西風一雁水邊郭落日數帆烟外舟欲把
登臨倚長笛滔滔江漢不勝愁

鸚鵡洲

朝發漢陽郭言訪鸚鵡洲沙浮草萋碧中有萬古愁我昔
悲正平懷刺無所投繼復愧正平隨地成羈畱依人而嫚
罵若與性命仇惜不死奸操深計爲所售士生處亂世無
才匪深憂豎子亦已矣俯仰悲千秋

漢江曉發

露白葭蒼候江清漢廣閒五更乘曉月一路看秋山鷗夢

先人覺雲心比客閒乾坤此空闊放棹未知還

武昌雜詩

上游形勢百蠻分黯慘蠻天易夕曛西上荆門江一綫南
來衡嶺雁千羣郢中有客皆詞賦楚國何峯不雨雲誰信
曲高真和寡至今延露總難聞

由來作鎮未堪都花草吳宮又廢墟江漢欲浮天地外山
川渾老戰爭餘舳艫銜尾心空肚鐵鎖沈沙計早疏我喜
時清久延眺未因貪食武昌魚

夾岸雙城陡翠微登臨誰與共清暉更無老子連牀話敢
望仙人跨鶴飛嶺上鳳凰歸未得月中烏鵲去何依漢陰
咫尺愁相望何日勞生此息機

魯口帆檣取次開，扁舟常繫鵲磯隈。
三春無樹非垂柳，五月不風猶落梅。
樓上休誇崔顥句，天涯誰識禰衡才。
可憐夙負黃童譽，漂泊翻成異地哀。

黃州

青山壁立浪飛銀，蝶翅杈杈瞰水濱。
隔岸武昌猶有樹，下流彭蠡漸無津。
祇應風月歸吾輩，誰見功名似昔人。
解唱大江東去曲，蘇公真是再來身。

晚泊九江尋琵琶亭故址

晨發黃州郭，夕宿潯陽渡。
沙平岸闊不見人，瞥過千重萬重樹。
潯陽渡口風蕭蕭，江州城外魚龍驕。
匡廬作雲半江黑，倒吸白浪如山高。
是時日落葭莢暗，溢浦瑟瑟生寒濤。

一舟衝浪去杳杳獨雁帶雨來迢迢角聲振木木葉脫秋
聲漸高秋思發無言攬袖起徬徨卻倚蘭橈望天末吳頭
楚尾烟冥冥獨立百感來無情江風吹面酒亦醒掣笛吼
作狂龍聲短衣踉蹌步沙灘草閒尋得琵琶亭崩堤毀岸
人跡絕狐狸跳嘯鼃鼃鳴昔聞樂天此閒夜送客琵琶聲
停江浸月擬向江山作主人卻因商婦悲遷謫我亦天涯
有淚人對此茫茫慘無澤吁嗟乎淚亦不必落愁亦不必
愁君不見茫茫九派東向流千古萬古無時休我家乃在
東海頭西風滿意吹數日一笑可上吳淞舟純鱸蝦菜萬
事足安用江湖歎傲裘

月中泛小孤山下

烟水月明處中流一溯洄湖過彭蠡盡潮到小孤迴獨鶴
掠舟過神魚聽曲來不知疏柳岸長笛爲誰哀

夜登小孤山和壁閒韻

闕寢神宮最上頭客來孤歎海關秋誰標鐵柱成終古卻
笑金焦屬下流崖勢欲隨驚鶻颺鼓聲時逐怒濤浮彭郎
相望情何許指點蛾眉月上洲

舟中望九華

九峯何巔劣秀出東南隅分根擲黃海削黛參匡廬名與
八桂泐地近三天都楚江走其下練帶烟中鋪秋水淬劒
鐔清波濯芙蕖天色矗破碎雲氣交模糊前景轉盼失後
態觸睫俱可望不可卽信矣高真居一帆去何駛百里青

猶餘長呼謫仙人山中近何如

荻港舟次遇徐遜齋太守罷官歸滇南

浮雲變態何須與此翁今作溪上客見山一笑神已往隨
處題詩興成癖意外相逢山水閒驚定成歡話疇昔疇昔
五馬來江東停麾問俗何雍雍黃州竹樓臥蘇軾新安鍊
溪釣任公

公先佐黃州後守新安

僕也騎驢看山至一榻陳蕃荷高

誼雅吹投壺興有餘風前時露烟霞氣紛紛賓從厭梁肉
公也齋居飽饘粥一魚不受清已極五袴得歌樂亦足今
朝襤被歸去來侬儂妻孥散僮僕片帆曉拂菰蒲開隻影
夜抱魚龍宿我聞碧雞山與金馬連各勝秀出西南天公
也茅屋居其閒數頃尙有桑麻田著書歲月且未艾翁自

樂此何憂焉只有賤子感填臆短歌飲氣別不得風波一
失萬里長落落行藏誰共商更語東山且休臥漢廷早晚
起循良

靈澤夫人祠

空江落日黯祠門髣髴雲裳涕淚痕一慟無由恩已絕兩
家多故事難言千秋杜宇休啼血萬里蒼梧合斷魂終古
湘靈有祠廟流傳真偽更誰論

天門山

我登南梁山下瞰岷江流大江天險限南北茲作巨鎮當
上游熊蹲獅伏勢絕陡急湍盤渦此閒走初疑鰲窟忽掀
翻倒插雙螺礙星斗梁山博望二而一導江忽劈巨靈手

兩崖屹立成千秋，卻笑龍門只培塿。嵌空怪石何嵒巖，萬丈起自蛟龍宮。陰崖破碎浪花蹴，絕頂的皜霞光烘。潯陽九派浩東去，徑須一束緩其怒。從此滔滔入海流，此是江山不平處。江山鎖鑰當吳頭，上流有事茲咽喉。誰知設險固無益，興亡過眼誰能畱。寄奴宮殿今何在，王濬樓船萬古愁。

舟中望金陵

片帆昨日下吳頭，破浪來看建業秋。九派江聲猶入夢，六朝山色已迎舟。樓臺未盡埋金氣，風景難消擊楫愁。回首燕磯隨柁尾，寄聲風利不能休。

僧齋夜詠

一臥維摩室閒身耐寂寥經魚敲落月佛火引深宵避縛
思捐劒逃聲欲棄瓢何因老松檜風雨尙蕭騷

對月

鍵戶謝人事茅堂夜色虛月明經客久風意逼秋初親老
貧猶健交稀病更疏還遲卜居願吾亦愛吾廬

城南晚步

空城何莽莽風色肅以高荆蕪翳崩葉亂鳥鳴相號一葉
得秋意吹墮溪塘坳踽步慘無憚寓曉萬感交悲哉秋氣
淒六合爲蕭條身計無一成少壯已二毛山邱忽零落顧
影馳暉飄所以古先哲相勉惟濁醪無爲末士感永貽來
世嘲

新涼曲

聞道邊城苦霏霏八月霜憐君鐵衣冷不敢愛新涼

十八夜偕稚存看月次韻

西風嫋嫋露溥溥一葉驚心墮曲欄久病倍添明月好此時真共故人看但工飲啖猶能活莫說飄零怕減歡自分無才合蹉跌深秋料理釣魚竿

舟泊偕稚存飲江市次韻

小住征橈醉旅亭晚鐘烟外正星星不知明月幾時有但見數峯江上青葭莢暗時秋雨過魚龍多處溼風腥鄉關此夜休回首極目川塗正杳冥

舟中再疊前韻

萬株衰柳黯津亭湖海相邀作客星此去故人衣脫白但
逢狂客眼同青江城雁帶邊聲苦澤國秋蒸海氣腥襍被
依依兩愁絕夜深擊楫溯空冥

三疊前韻

柳外長橋水上亭舊遊零落似晨星懷人有恨蒼葭白照
客無眠夜火青幾度塵衣淚霑溼多時短鐵氣餘腥漁翁
未識風波苦一曲滄浪去窈冥

江上曉發

五更驚風起江靡布帆一峭百餘里海門月落烟冥冥兩
點金焦沒船尾舵樓吹笛誰家子吹白蘆花點江水江水
茫茫去不休蘆花如雪白人頭試看擊楫中流客何似烟

波一釣舟

中秋夜游秦淮歸城南作

城南好酒如春泉醉塌酒家樓下眠醒來露重葛衣冷正
見皓月當中天呼僮起步六街去香塵寶轂清溪邊玉簫
子夜聲未歇雛姬十五歌可憐此時據鞍我亦樂顧影不
覺猶少年惜哉花月只空度春江回首愁如烟去年此夜
人初別今歲今宵已成憶懷人中酒自年年此時愁煞天
涯客桃葉渡莫愁湖昔日佳麗今有無殘金賸粉帛不盡
徘徊漏下啼城烏啼烏啞啞天將曉走馬卻出長干道到
此惟餘萬古愁荒荒月落高城小

閒居感懷

齋居屏煩緣百慮乘我急吉人尙寡辭達士厲高執我生
何懵懵寓物易歌泣學道無死心兀抱枯骸立邪陷正色
衰神迂鬼氣入五葢游相蒙四蹙紛以集詰朝理容成撫
鬢黯鳴嗚所處若長夜百年何所及春華散條柯秋爽被
原隰逢欣稍於於紆感仍邑邑投境罕靜探懷古味深汲
多言竟何成諛詞徒結習安能凌風翔永謝塵網繫

過維衍畱宿燈下次韻

短檠同話雁來天角盡巖城思悄然衣上黃河懸別淚尊
前錦瑟記流年壯懷未許看雲臥遊地重邀聽雨眠知爾
生平亦蕭瑟好拋幽悵結纏綿

重九夜偶成

悲秋容易到重陽
節物相催黯自傷
有酒有花翻寂寞
不風不雨倍淒涼
依依水郭人如雁
戀戀寒衣月似霜
差喜衰親話真切
一燈滋味異他鄉

步從雲溪歸偶作

多時縱腰腳百病成一慵
今來眺原麓氣候歸初冬
疏樹語撼撼薄雲卷空空
視聽及蕭索寸心驚飛蓬
枯草踏成路下與清溪通
落日見隻影乃臥寒流中
澤淺魚避餌收釣溪生風
太息歸荆扉燈火慘不紅
興至偶欲賦景失無由蹤
惟應付沈醉何須嗟困窮

驟寒作歌

秦歲首後七日夜五更
不周風發狂殷山萬竅
拉枯木壓

地徑寸堆酸霜千門蜩縮盡嗟息聲薄冷圭成白光去冬
途中敝黑貂今秋江上典鷓鴣多年衣絮凍欲折氣候有
爾自不防富人一歲獨苦暑寢人四時惟畏涼漸愁空牆
日色暮豫恐北牖寒宵長誰將彤雲變狐白無聲被遍茅
簷客

屠清渠丈過飲醉後作山水幅見遺

先生一笑如河清醉後往往一見之卽令不飲持大盞已
覺春氣盈鬚眉平生胸中富邱壑意象獨到無專師常時
兀兀不動手醉來潑墨風雨馳長虹俯吸海波立乖龍上
蹴天雲垂及當精心運毫末雙目炯如漆點脂圖成掛我
竹間屋恍有光怪來窮追翻樽卻避坐上客索栗怖走鄰

家兒先生掀髯忽大笑壓興還用傾千卮鄙人不飲喜觀
飲先生善畫兼愛詩短纖尺幅許投贈日來爛醉無不宜
我歌君飲萬事足更看醉墨揮淋漓

冬夜左二招飲

清霜壓東郊寒籟號北牖出門無所適動詣素心友發寶
傾凍醅膾鮮斫巨口輝輝明燭光肝膽此可剖脫身風塵
中所賸持螯手誰知歲寒夜復此共杯酒元龍氣未除竹
馬期敢負百年盡今夕那暇圖不朽作達信有涯生天獨
甘後及時且斟酌不薄乃云厚漸畏人影亂卽歡變回首
一身墮地來恨事常八九飲罷夜氣高落落數星斗

十三夜復飲左二齋頭

疾風吹野霜我心感孤獨轉側念同袍燕晚共羈曲斗酒
相慰勞攄抱無踏跼暮色蒼然來朗吟擊空木昔悲緣分
飛後憶此信宿各懷萬里志且復對短燭願回君子心與
厭小人腹萬事有明日盈觴更相屬宵短難繫繩飲深漸
頽玉我舞方傲傲鄰雞莫相促

問渡

道逢漁父來指點停舟處只在小橋邊風吹著溪樹

兩當軒集卷第二